

Platt partu:

Rundbreef 2926-03

AfD-Schandaal

Nu kiek di mal de Rechten an!
Rechtschapen snackt s', en mild Choral;
man lettst du eerst de echten ran,
denn süht: ehr Doon, dat killt Moral.

Moinmoin, leve plattdütsche Maten un Frünnen!

Ja, "Moinmoin", nich "Moin"! Ofschoonst mi kloor is, dat dat singuläre "Moin" kumplett langen deit. En Fründ hett mi annerletzt dorwegen al den Kopp wuschen, mi kloormaakt, dat dat Duppelmoin Tüdelkraam is. Avers dor geiht mit mi jümmers de Dichtersche dörch: To den wichtigen Vulltakt "Moin!" kann un kann ik mi nich överwinnen, denn so'n Begröten, dat mutt för mi eenfach en Optakt ween -- dat lichte, opstiegen "Moinmoin!", 'neem dat tweete "Moin" natüürlich de Betonen driggt. Denn warrt ut de Reeg "Moinmoin, leve plattdütsche Maten un Frünnen!" ok glieks en Vers mit Regelmaat: '_ _ '_ _ '_ _ '! Wenn düsse Reeg mit dat vulltaktige "Moin" dör de Dör donnert — nee! So'n mächtig Buukgefühl kann ik nich gegenan. Nix för ungood, leve plattdütsche Maten un Frünnen, wenn ik mit "Moinmoin" gröten do!

Nu avers to den Maan op Plattpartu! De weer en eher sporsame Maan, man wi sünd ja ok in de Fastentied — in de Passion. De füng mit den [Sünndag Invocavit](#) an, den Ludgerd Lüske in sien Passionsreeg düt Johr mit niege Biller, egen Texte un antike Antiphonen utdüden deit. Ja, dat geiht op Oostern! Un ok de [Winter, so schön he is](#), hett bilütten utspeelt un [lett uns nu langsam ut sien Fäng](#). Nu glieks [Rosendag to fiern](#) as de Amerikaners, dat weer 'n beten vermeten, man tominnst op [Lichtmess kannst di besinnen](#). De [Kinner backt al Sandkoken](#) staats Sneekoken, in en niege Mini-Reeg vertellt de [olen Eken vun Ivenack](#) vun dusendmaal frisches Gröön in dusend Lente, un [bet April töövt wi](#) bloots noch op de Artemis-Missioon. Dat warrt hell bi uns.

Op de anner Siet warrt dat in de Welt anschienen jümmer düüsterer un verbiesterter — [nix as Gewalt](#). Nu noch en Krieg, as wi jüst veer Johr Krieg in de Ukrain hebbt! De [Soschaalstaat warrt de Rüstung oppert](#), [Rassisten warrt mit Samthanschen anfaat](#), de [Krieg regeert bald autonom de Welt](#)... Dat geiht op Duer ok op de Seel; [sogor wi Boomers](#), de as Kinner [noch analoog dröömt hebbt](#), köönt [de Schaddensieden eenfach nich mehr utblenden](#). Kann't ween, dat de Welt [ganz ut düüster Materie](#) is?

Kann [Tovertruun](#) uns Höpen un [Lösigkeit](#) lehren? — De [Geschichte is lange Weeg gahn](#). De olen Eken vun Ivenack warrt noch stahn un ok noch blöhn, wenn uns Minschenwelt wedder heel anners utsüht.

Wi leest uns Anfang Oostermaand wedder, wenn de Lent üm uns blöht un de Welt sik wiederdreiht hett. Blievt Se fein towegg bet denn!

Nu de Linkliste. Op de Links bruukt Se bloots klicken, dat Se henkaamt.

[Plattdüütsch Künst:](#)

[Notizen ut'n Heumaand](#). Fotos un Verse vun Marlou Lessing (8.2.)

[De Welt un Gott:](#)

[Komm un süh de Welt!](#) Vun Berthold Cordes (27.2.)

[Veer Brundörper Fruens vertellt vun fröher — Deel 7: Brundörp un ümto](#). Vun Meike Balzer-Fraun (22.2.)

[Zyklus "Gewalt", Deel 1](#). Vun Hans-Hermann Briese (22.2.)

[Passionstied 2026: Sönndag Invokavit — Hei röpp mi](#). Van Ludgerd Lüske (22.2.)

[Olle Böm vertellen lies: Dei Eiken tau Ivenack](#). Vun Behrend Böckmann (15.2.)

[Lichtmess wier mal 'n Fierdach](#). Vun Behrend Böckmann (14.2.)

[7. Hornung — dei amerikaan'sche Rosen-Dach](#). Vun Behrend Böckmann (8.2.)

[In't lütte Gebedbauk:](#)

[Tovertruun](#). Vun Marlou Lessing (22.2.)

In't [Notizbook vun't Erinnern](#):

[Boken vull Biller](#). Vun Hans-Hermann Briese (28.2.)

[Natur un Wetenschap:](#)

[Vörjohrsriemels](#). Vun Behrend Böckmann (14.2.)

[Düüster Materie: Dat Finnen van neie Deilkes](#). Van Ludgerd Lüske (8.2.)

In't [aktuelle Natur-Notizbook](#):

[Töven bet April](#). Vun Marlou Lessing (22.2.)

[Wintermärken](#). Vun Marlou Lessing (14.2.)

Wat in de Welt vörgeiht:

- Maat Jan un sien Generaschoon: Bumm Bumm Boomer. Vun Maat Jan (28.2.)
Robotersoldaten. Vun Behrend Böckmann (20.2.)
Maat Jan as Gerichtsreporter: De düütsche Michi. Vun Maat Jan (15.2.)
Den Sozialstaat reformiern. Vun Behrend Böckmann (8.2.)

In't plattdüütsche Notizbook vun Marlou Lessing:

Keen Hooch op den gelen Wagen! (20.2.)

För Kinner:

Modder Sünn ehr Kinner: In de Sandbäckerie. Märken vun Sophie Reinheimer,
överdragen vun Klaus-Dieter Tüxen (27.2.)

Hartlich grööt

Marlou Lessing un dat lütte Plattpartu-Team